



Kuvendi i Komunës Klinë
Komiteti për Politikë dhe Financa

01Nr 06-23288 /23

Klinë, dt: 19.07 /23

PROCESVERBAL

Nga mbledhja e VI-të e rregullt e Komitetit për Politikë dhe Financa, mbajtur, më 16.06.2023, me fillim nga ora 09:00 në sallën e Kuvendit të Komunës.

Mbledhjen e hapi Kryesuesi, z. Fadil Gashi, i cili përshëndeti të gjithë anëtarët e Komitetit, OSBE-në, drejtorë të drejtorive dhe të pranishmit.

Kryesuesi, prezantoi rendin e ditës:

1. Arsyetimi i mungesave,
2. Shqyrtimi dhe miratimi i procesverbalit të mbledhjes së kaluar,
3. Shqyrtimi i Draft Kornizës Afatmesme Buxhetore 2024-2026,
4. Shqyrtimi i propozim-vendimit të Drejtorisë së FEZH për bartjen e mjeteve nga të hyrat vetanake,
5. Shqyrtimi i kërkesave të arritura për Komitetin për Politikë dhe Financa, për muajin maj-qershor 2023,
6. Të ndryshme.

Fadil Gashi, Kryesues: Nëse pajtoheni, ne kishim filluar me mbledhjen e rregullt të KPF-së, meqë jemi 6 anëtarë. Azdren Ramadani veç ka treguar se s'mund të merr pjesë sepse është jashtë Kosovës.

Rendin e ditës besoj që e keni, materialin e keni, nëse ka dikush për rend të ditës, kush është për?

Me 6 vota PËR, asnjë kundër dhe asnjë abstenim u miratua rendi i ditës.

Pika 1. Arsyetimi i mungesave.

Fadil Gashi, Kryesues: Unë sapo e thash se veç një konfirmim e kam te Azdreni, 6 anëtarë tjerë jemi prezent.

Pika 2. Shqyrtimi dhe miratimi i procesverbalit të mbledhjes së kaluar,

Fadil Gashi, Kryesues: Po hap debat për procesverbal, nëse ka dikush, nëse s'ka, kush është për?

Me 6 vota PËR, asnjë kundër, u miratua procesverbali i seancës së kaluar.

Pika 3. Shqyrtimi i Draft Kornizës Afatmesme Buxhetore 2024-2026.

Fadil Gashi, Kryesues: Ju dhe ne, tani më e kemi një përvojë të mjaftueshme në ndërtimin e Kornizës Afatmesme Buxhetore. Akoma është duke u arsyetuar edhe nëpër terren, ne veç e kemi marr agjendën edhe në seancë të rregullt të Kuvendit kur e keni lëshuar në diskutim publik draftin e kornizës, tash nuk e di sa është pjesëmarrja e anëtarëve të Kuvendit edhe të KPF-së, po KPF-ja veç ka obligime me qenë pjesë e atyre debateve. Po ju inkurajoj secilin edhe këto pak çka kanë mbetur në terren, që po zhvillohen debate për Kornizën Afatmesme Buxhetore, nëse mund të ju bashkoheni pjesës, se ne kemi obligim, e dyta është performanca që ne duhet ta plotësojmë edhe si performancë, sepse drejtorja dhe ekzekutivi janë duke e zhvilluar këtë në terren dhe i kanë përcaktuar lokacionet ku mbahen.

Unë s'po marr më shumë kohë, e kemi drejtorin këtu, nëse dëshiron të na bëjë një prezantim rreth kornizës, pastaj hapim debat.

Enver Berisha, drejtor i FEZH: Faleminderit, kryesues, të nderuar anëtarë të KPF-së, i nderuar drejtor i OSBE-së, z. Driton Marku! Ashtu siç e tha kryesuesi i Kuvendit, ne jemi në fazën e debateve publike rreth Kornizës Afatmesme Buxhetore për vitin 2024-2026, edhe në seancën e fundit të asamblesë komunale, ne kemi pasur thirrjen që anëtarët e Kuvendit dhe gjithë qytetarët të bëhen pjesë e këtyre debateve. Ky buxhet që është i planifikuar për vitin 2024 e tutje, është buxhet që u shërben qytetarëve dhe qytetarët është mirë të bëhen pjesë e këtyre debateve, për shkak se i ofrojnë idetë e veta, i ofrojnë projektet e veta, dhe na ofrojnë bashkërisht. Ekzekutivi, Kuvendi dhe qytetarët bëhen pjesë të një drafti që në një formë do të jetë i pranueshëm për gjithë në fazën vijuese të kësaj Kornize Afatmesme Buxhetore.

Ne, siç e tha edhe kryesuesi, veç kemi filluar nga dita e djeshme me debatet me publikun, ishim mbrëmë në bashkësinë lokale të Sferkës, në bashkësinë lokale të Gllarevës dhe në bashkësinë lokale të Ujmirit, ndërsa sot e vazhdojmë me bashkësinë lokale të Jashanicës dhe të Drenocit,

ndërsa javën tjetër vazhdojmë me bashkësitë lokale, Grabanicë Zajm, Budisalc dhe Zllakuqan. Meqë edhe përmes mikrofonit të këtij Kuvendi, unë u bëj thirrje të gjithë anëtarëve të Komitetit, anëtarëve të Kuvendit dhe gjithë qytetarëve të këtyre zonave, që të bëhen pjesë e këtyre debateve me qytetarë, me të vetmen arsye që të jenë pjesë e projekteve dhe zhvillimeve që janë në interesin e tyre, e këtu i keni, pra, shifrat e buxhetit 2024 është 14,781,718.00 euro, që është dukshëm më i mirë sesa buxheti i vitit të kaluar, që ka qenë 13,051,000.00 euro, dhe kështu ngrihen dmth për çdo vit, dmth për vitin 2025 dhe 2026, ky buxhet i planifikuar për vitin 2024 dmth është i përberë prej të hyrave vetanake, që janë planifikuar 1,432,000.00 euro.

Buxheti i të hyrave ju veç e dini që krijohet nga qiratë, nga bizneset, nga tatimi në pronë dhe nga gjobat, ato mjete janë mjete të komunës dhe shfrytëzohen normal për interesin e qytetarëve tanë, ndërsa nga grandit qeveritar i kemi kësaj here 13,361,000.00 euro, që në njëfarë forme janë të ndara në këto kategoritë të cilat ne përballemi në vitin kalendarik.

Paga dhe mëditje janë pjesa dërrmuese 7,830,000.00 euro, dmth po e shihni që grandit për paga dhe mëditje është dukshëm më i madh, për faktin se ka ndodhur Ligji i pagave e që një pjesë e administratës komunale tash ka pagë më të madhe se që ka pasur në të kaluarën, po ashtu edhe të mëditjet dhe paushallët tjerë që janë dukshëm më të larta për disa kategori që përfitojnë nga kjo, mallra dhe shërbime janë 1,710,000.00 euro, shërbime komunale janë 250,000,00 euro, subvencione që kryesisht janë në Zyrën e kryetarit ashtu siç e dini ju, janë të planifikuara 500,000.00 euro. Këtu kryesisht hynë pagesat për personat e rasteve të vdekjeve, për raste të lindjeve, për probleme shëndetësore, por edhe për ndonjë marrëveshje që kryetari mund të arrijë në organizatë të caktuar për kur kërkohet bashkëfinancimi, dhe në fund është pjesa më kryesore që i intereson qytetarit, është grandit ose shpenzime për projekte kapitale që është në vlerë prej 4,500,000.00 euro, dmth këtu ndoshta qytetarët mund të japin kontributin më të madh që kjo shumë për projekte kapitale të shfrytëzohet në bazë të vullnetit dhe interesave që qytetarët kanë për ta realizuar këtë buxhet dhe për t'i arritur ato synime dhe ato projekte që ata kanë nevojë më së shumti.

Unë më tepër nuk isha lëshuar, nëse dikush ka nevojë për të sqaruar ndonjë çështje të caktuar, do të jem i hapur, por edhe njëherë po ju them, ju kisha bërë lutje meqë ende ka hapësirë, që ju dhe qytetarët të bëheni pjesë e debateve në terren për këtë Kornizë Afatmesme Buxhetore, faleminderit!

Fadil Gashi, Kryesues: Faleminderit, drejtor! Unë po hap debat rreth Kornizës Afatmesme Buxhetore, nëse ka dikush, urdhëroni, po, Tunë Deda?

Tunë Deda: Përshëndetje për ju kryesues, përshëndetje për ju drejtorë, përshëndetje për të gjithë të pranishmit, për përfaqësuesin e OSBE-së! Unë e pash, por nuk pata shumë kohë ta lexoj, porsa e mora, është një kërkesë e imja personale, që të parashihet gjatë këtyre viteve 2024-2026 në Kornizën Afatmesme Buxhetore, që çdo pëllëmbë tokë që është e mundshme të ujitet. Parashihet të ndahet buxhet për rregullimin e pendëve dhe kanalizimeve për ujitje, edhe e kam një kërkesë, që në Deiq i merr uji sa herë që bie shi disa shtëpi aty, që të ndahet buxhet për vitin e ardhshëm të kryhet një kanal, të bëhet me beton, që këto shtëpi të shpëtojnë nga vërshimet, kaq kam.

Fadil Gashi, Kryesues: Faleminderit, Tunë! Po, urdhëro, drejtor?

Enver Berisha, drejtor i FEZH: Faleminderit, Tunë! Këto dy çështje që ju i ngritët, kanë qenë pjesë e debatit të brendshëm edhe të kryetarit me ne ekzekutivin, dhe zotimi i kryetarit dhe i yni do të jetë që do të bëhet një incizim i terrenit në përgjithësi për problemet që i kemi te vërshimet, dmth prej këtij viti po edhe viteve në vijim patjetër, dhe e dyta; edhe unë dakordohem dhe kemi pasur kërkesa edhe në Bord, që grandit ose mjetet për bujqësi të rriten në këto vite vijuese, për shkak se kanë nevojë njerëzit ta punojnë tokën. Ne e kemi pasur sivjet, veç interesimi për serra e për gjëra tjera ka qenë jashtëzakonisht i madh dhe ne do të shikojmë që realisht t'i ofrojmë me ato mundësi që i kemi njerëzve që janë të interesuar ta punojnë tokën, ta ujisin edhe të pajisen me mjete të caktuara.

Fadil Gashi, Kryesues: Faleminderit, drejtor, dikush tjetër?

Tunë Deda: Unë thash që të parashihet në kornizë, të ndahen mjetet, të ndryshohet kjo që është e propozuar, të dalin në terren për incizime edhe brenda këtyre viteve, dmth 2024-2026, mos të na mbetet neve asnjë pëllëmbë tokë ku është e mundur të ujitet pa e pasur të rregulluar sistemin e ujitjes, do të thotë sistemi i ujitjes është ngritjen e pendëve edhe hapjen e kanaleve të ujitjes. Jam i sigurt se përmbi 30% nuk është e mbuluar me ujitje komuna e Klinës në ato vende ku ka mundësi, p.sh., duke e paraparë prej Stupe e deri në Dollovë, që është një tokë e shkëlqyeshme për zhvillimin e bujqësisë, edhe prej Poterqit deri në Dollovë, njëjtë, nuk është përmbi 30%. Ka mundësi, ne po e shohim që ka probleme me prodhimet bujqësorë dhe ka mungesë. Mallrat e importuara po thonë janë kancerogjene, nuk guxojmë as t'i hamë, tash t'i bëjmë edhe ne prodhimet tona, kaq pata. Unë jam i sigurt që ka mundësi komuna për t'i lënë disa rrugë, për t'i lënë disa gjëra tjera edhe me ju të angazhohemi për rregullimin e këtyre punëve, faleminderit shumë.

Fadil Gashi, Kryesues: Faleminderit, dikush tjetër? E keni pak më ndryshe, sepse po e shoh që, ne, këtë vit, edhe në vizion, edhe në zhvillimin ekonomik, edhe në strategjinë që ne veç jemi duke e punuar strategjinë zhvillimore, që ka obligim të harmonizohen njëra me tjetrën, është edhe përfshirja në bazë të gjinive, duke i përfshirë edhe burra, gra, vajza, djem, edhe në fund është një analizë sepse po kemi nganjëherë keqkuptime në ndërtim të këtyre dokumenteve, kush përfiton. Ne po mundohemi sa e sa herë ta sqarojmë, edhe kur është fjala te buxheti gjinor se ne kemi performancën më të rëndësishme se edhe na kërkohen edhe nga faktorë tjerë, edhe nga organizatat, qofshin qeveritare dhe joqeveritare, si është ndarja e buxhetit gjinor. Prandaj po besoj që pak më në detaje është në këtë vit i shkoqitur, duke i përfshirë edhe analizën edhe orientimet e shpërndarjeve të projekteve të përfitimit e këtyre të mirave materiale, që kthehen te qytetarët, te secila kategori. Prandaj, këto shuma që janë të orientuara, këto kanë mundësi të riparohen, se ne pas saj kemi pastaj buxhetin për vitin 2024, kemi kohë për t'i marr e për t'i orientuar ende, duke i inkurajuar.

Siç e tha edhe drejtori, aty ku e shihni se ka arsye, ku e shihni se ka nevojë, aty ku e shihni se janë më me prioritet, kudo që ju vlerësoni që duhet të intervenohet, që ka kohë ende derisa të shkojmë në Kuvend. Kur të shkojmë në Kuvend, kjo e merr formën e vet edhe pastaj në bazë të kësaj ne fillojmë ta ndërtojmë buxhetin, a ka dikush? Nëse s'ka, kush është për ta rekomanduar për Kuvend?

Komiteti për Politikë dhe Financa, pas shqyrtimit të Draft-Kornizës Afatmesme Buxhetore 2024-2026, me 6 vota PËR, rekomandoi për shqyrtim dhe miratim në Kuvend.

Pika 4. Shqyrtimi i propozim-vendimit të Drejtorisë së FEZH për bartjen e mjeteve nga të hyrat vetanake.

Fadil Gashi, Kryesues: Ne e kemi besoj edhe kërkesën edhe shkoqitjen e shpërndarjes, të bartjes realisht, si kërkohet, po veç ju kisha lutur që mos mendoni që është hera e parë, po më duket që kjo është hera e tretë që këto mjete i marrim, i heqim, i vëmë. Tash na i ka lejuar prapë qeveria, prape duhet marrë në vendimin tjetër, edhe e mira është që ne i kemi tash edhe këto mjete edhe janë të orientuara kështu si e kanë bërë propozimin. Nëse dëshiron drejtori edhe pak të na sqarojë, ju kisha lutur edhe pastaj kishim hapur debat?

Enver Berisha, drejtor i FEZH: Faleminderit, kryesues! Ashtu si e thatë edhe ju, dmth këto janë mjete që janë votuar njëherë në këtë Kuvend, dmth që është dashur me nxjerrë vendim tjetër ne, me i anuluar për shkak të vendimit të qeverisë së Kosovës, që bëhet kah fundi i vitit 2022, i ka tërheq ato. Vlera e kësaj shume ka qenë 346.194.00 euro, por pas një rezistence si e keni parë ju, të subjekteve tjera politike dhe të Kuvendit dhe këto mjete qeveria ka vendosur të na rikthejë, dhe ky vendim ka ardhur edhe ne prapë kemi qenë të obliguar që ta kthejmë këtë buxhet në Kuvend, që të krijohet një vendim i ri. Kryesisht shpenzime që kanë qenë të planifikuara janë përgjithësisht ato që kanë qenë edhe më herët, në kuadër të kësaj shume me ndryshime të vogla. Tash po e shihni këtu që, mallra dhe shërbime janë ndarë në 6,000 00 euro; shpenzimet komunale bëhen prej 3,374.57 euro; dhe pjesa dërrmuese ka mbetur prapë në shpenzime për kapitale, që vlera e tyre është 336,820.00 euro. Dmth, unanimisht janë po ato mjete siç i keni votuar edhe më herët, por me vendimin e qeverisë për marrje, dmth ne e kemi anuluar, tash po kërkohet prapë një vendim i ri që me vendimin e kuvendit në seancën e ardhshme ne duhet të dërgojmë prapë në Ministrinë e Financave dhe në thesar, që ato mjete dmth t'i kemi ne në dispozicion për realizimin e këtyre projekteve, ashtu siç i kemi paraparë bashkërisht, faleminderit.

Fadil Gashi, Kryesues: Faleminderit, drejtor! Po hap debat, Tunë Deda?

Tunë Dedaj: Po, kryesues, po më vjen shumë mirë që qeveria më në fund ka marr vendim për kthimin e tyre. Është dashur me i lejuar komunës me kohë që të punohet me to, edhe unë pajtohem me këtë parapamje, por desha ta bëj një pyetje për drejtorin: A ka mundësi nga këto mjete që janë për shpenzime kapitale, të parashihet që të rregullohet kanali, që mos të ketë vërshime në Krushevë të Vogël dhe në Deiq?

Enver Berisha, drejtor i FEZH: Faleminderit, Tunë! Pjesa e kanaleve të ujitjes dhe ato që i thatë më herët ju, dmth ato hyjnë në projekte tjera, jo në kuadër të saj, për faktin se këto veç kanë qenë të planifikuara më herët edhe nuk kemi mundur të bëjmë lëvizje shumë, përqindja më e

madhe duhet të shkojë aty si i kemi votuar njëherë në Kuvend. Kështu që, pjesa që ju po e kërkoni, ajo hyn në projekt të ri të këtij viti, që janë projekte buxhet i rregullt dhe në planifikimin e buxheteve të ardhshme në vijim.

Fadil Gashi, Kryesues: Faleminderit, drejtor! Dikush tjetër? Urdhëro, Mendehie?

Mendehie Duraku: Faleminderit, kryesues, përshëndetje për të gjithë! Meqenëse qeveria e ka lejuar shfrytëzimin e këtyre mjeteve, desha ta pyes drejtorin se çfarë ndodh me këto mjete nëse nuk arrijnë të shfrytëzohen këto para, sepse jemi në muajin e gjashtë të këtij viti 2023, çfarë ndodh me këto para, nëse ne nuk arrijmë t'i kryejmë gjitha këto projekte që i kemi?

Enver Berisha, drejtor i DUMM: Faleminderit, e nderuara Mendehie! Realisht nuk do të ketë këso probleme në shpenzimin e këtyre mjeteve, për shkak se ne këto mjete i kemi planifikuar më herët dhe këto projekte dhe këto gjëra që kanë qenë në kuadër të këtij buxheti, do të fillojmë menjëherë me u shpall dhe me filluar, për shkak se ka qenë e planifikuar dhe unë besoj që kësaj here, jam i bindur që këto mjete do të realizohen një për një brenda këtij viti.

Fadil Gashi, Kryesues: Faleminderit, dikush tjetër? A ka dikush tjetër?

Komiteti për Politikë dhe Financa, pas shqyrtimit të propozimit për bartjen e mjeteve nga të hyrat vetanake nga viti 2022 në vitin 2023, pa ndonjë vërejtje apo sugjerim, me 6 vota PËR, rekomandoi që ky propozim të kalojë për shqyrtim dhe miratim në Kuvend.

Pika 5. Shqyrtimi i kërkesave të arritura për Komitetin për Politikë dhe Financa, për muajin maj-qershor 2023.

Kërkesë nga OJQ "ZANA"

I nderuar kryetar Elezaj, OJQ "Zana" është themeluar në vitin 2022, dhe që nga atëherë përmes projekteve të ndryshme nga donatorë ndërkombëtarë dhe vendorë, ka ndihmuar grupet me nevojë, siç janë: gratë, fëmijët me nevoja të veçanta dhe minoritetet RAE. Që nga viti 2018 në kuadër të OJQ "Zana" vepron edhe Qendra e Kujdesit Ditor, ku deri më tani kanë marrë shërbime rreth 130 fëmijë me autizëm-sindrom Down dhe me dëmtime të lehta psikologjike. Fondet që kemi shfrytëzuar për zbatimin e projekteve tona, janë kryesisht nga Institucionet e Republikës së Kosovës: Qeveria dhe Komuna, Bashkimi Evropian, USAID, nga organizata e Kombeve të Bashkuara dhe nga ambasadat e akredituara në Kosovë. Herë pas here, ne, po ashtu kemi pasur donacione nga biznese private të Komunës së Klinës. Të gjitha aktivitetet e OJQ "Zana" janë përfshirë edhe të hyrat, janë raportuar disa vite në Ministrinë e Administratës Publike si dhe në ueb-faqen e organizatës.

Komuna e Klinës ka qenë një nga mbështetësit kryesor të aktiviteteve tona, duke na ndihmuar me hapësirat për zyra, që nga viti 2012.

Mirëpo, në dy vitet e fundit, hapësira që ne e shfrytëzojmë është vërshuar në vazhdimësi nga shirat dhe si pasojë zyrat kanë pësuar dëmtime të theksuara. Duke pasur parasysh se ne

aktivitetet tona i realizojmë edhe me fëmijë, hapësirat aktuale të zyrave, për shkak të kundërmimit dhe mykut, janë bërë të dëmshme, sidomos për shëndetin e fëmijëve por edhe për stafin e organizatës.

Prandaj, po ju drejtohem juve me kërkesë për të na ofruar një hapësirë për zyre, rreth 180 m² katrorë, të përshtatshme për realizimin e aktiviteteve tona, sidomos aktiviteteve me fëmijët me nevoja të veçanta që ne i realizojmë në kuadër të Qendrës Ditore për fëmijë.

P.s: Ne kemi biseduar me biznese që dhurojnë donacione, pronari i "Market Nora" është shprehur i gatshëm të ndihmojë në rregullim të hapësirave, vetëm ka kërkuar dokumentin nga ana e Komunës për ndërrim të hapësirave për OJQ "ZANA", Klinë.

Fadil Gashi, Kryesues: Të njëjtën kërkesë besoj e kenë edhe ju. Po, urdhëro drejtor?

Enver Berisha, drejtor i FEZH: Kërkesa e OJQ "ZANA" ka ardhur në Zyrën e kryetarit, ka ardhur edhe në Drejtorinë e Financave. Ajo e ka një zyre në shfrytëzim edhe po kërkon një hapësirë tjetër, por ne jemi në një proces të ri sa i përket lokaleve që janë dmth pronë e komunës edhe jemi duke e bërë një lloj rivlerësimi të pronës së komunave, duke përfshirë lokalet dhe banesat. Jemi duke planifikuar që ta vëmë në ankand krejt këtë potencial që do ta kemi si komunë, të lokaleve që janë pronë komunale dhe OJQ "ZANA" ndoshta këtë punë nuk e di, por nuk ka më për të dhënë Drejtoria ose individi pronë në shfrytëzim të komunës, por duhet përmes një ankandi, përmes prokurimit. Ne nuk mund ta bëjmë vetëm për një lokal, por ne po shikojmë që ta bëjmë një shpallje publike për gjitha lokalet që janë aset i komunës dhe aty të mund të aplikojnë të gjithë. Këtë të drejtë me siguri do ta ketë edhe OJQ "ZANA".

Fadil Gashi, Kryesues: Atëherë, për të qenë pak më të qartë për anëtarët e KPF-së, krejt çka unë e kuptova prej drejtorit, se duhet me ja lëshuar Ligjit për Dhënie në Shfrytëzim të Hapësirave Publike, edhe një prej atyre kriterëve është që, ne, asnjë metër nuk guxojmë ta japim pa i zhvilluar procedurat e ankandit. Është një telashe dhe pakënaqësi e të gjitha organizatave joqeveritare në nivel të Kosovës, pikërisht për këtë pjesë. Por derisa nuk ndryshon ligji, ne, s'mund të ndryshojmë as këtë kriter, sepse ka këso kërkesa prej organizatave joqeveritare, sepse arsyeja e tyre është që ne nuk mund të aplikojmë në ankand karshi disa bizneseve që ata kanë interes me marr atë të lirë, edhe ne s'mund të konkurrojmë me ta. Është shumë e arsyeshme, por ligji e ka përcaktuar kështu këtë kriter edhe s'mundet as komuna dhe askush, derisa të ndryshohet ligji në Parlament të Kosovës. Po, urdhëro, Mendehie?

Mendehie Duraku: Faleminderit, kryesues! Unë thjesht nuk e kam kuptuar shumë mirë këtë kërkesën e OJQ "ZANA". Sa kam informacion, unë e di që kjo OJQ shfrytëzon dy lokale, tash desha të dijë se cila është pronë e komunës apo janë të dytë?

Dmth të dyjat janë? Se ajo kërkesën e ka bërë që edhe si lokal, që kërkon shfrytëzimin e aktiviteteve për fëmijët me nevoja të veçanta. Siç e dimë, shkojnë plot fëmijë, por siç ka potencuar ajo aty në kërkesë, ka thënë që është marrë disa herë nga vërshimet. Unë e di që aktivitetin me fëmijët ajo nuk e bën në atë lokalin atje ku e kanë marr vërshimet, thjesht e bën në këtë lokalin e Benites këtu më duket. Thjesht desha ta di se për cilën kërkon lokal, kërkon për aty ku i bën aktivitetet me fëmijët apo aty ku i ka zyrat e veta? Kaq, faleminderit!

Fadil Gashi, Kryesues: Për aktivitete me fëmijë.

Tunë Dedaj: Po, kryesues, unë mendoj që ata që kryejnë punë pa lekë është mirë t'i dalim në ndihmë, por, sa jam i informuar këto paguhen prej atyre prindërve edhe nuk e di që komuna ka obligim t'jua jap. Një kërkesë të tillë e ka bërë edhe shoqata "Nënë Tereza", për të pasur një hapësirë ku ju ndihmon të varfërve, edhe s'ka pasur mundësi me jua dhanë për shkak të ligjeve në fuqi që janë, është që dy vite ajo kërkesë edhe s'ka pasur mundësi.

Edhe shoqata e "Pensionistëve" është edhe më e arsyeshme me jua dhanë, edhe më e arsyeshme se çdo gjë, se pensionistët e meritojnë një tretman krejt të veçantë, nëse ka mundësi, atyre me jua dhanë është më mirë se çdokujt tjetër. Por desha të them që ato shoqata që paguhen, që marrin para prej prindërve, prej fëmijëve që janë me nevoja të veçanta, komuna nuk e ka obligim që t'ia sigurojë, bile ndoshta edhe ato që e kanë, mendimi im është se janë të tepërta.

Fadil Gashi, Kryesues: Dikush tjetër? Ne, besoj edhe si kuvend, edhe si ekzekutiv, kemi vullnet ta ndihmojmë secilin që ka nevojë prej familjeve, por ne duhet t'i shikojmë rrugët ligjore dhe rrugët procedurale, ku ne nuk bëjmë shkelje sepse duke shkelur ligje, procedura, nuk i ndihmojmë askujt. Nëse pajtoheni ju si KPF, ne përgjigjen duhet ta japim si institucion, ne e rekomandojmë nëse dëshironi për Kuvend, ne mund ta ndërprejmë rrugën e saj edhe këtu. Ky Komitet, për zonat që i sheh që nuk kanë rrugë për më tutje, i ndal këtu, i ka kompetencat ky Komitet, për atë është Komitetit para Kuvendit. Ne jemi filtri i fundit, prandaj jemi ne këtu, për atë ne kur marrim vendim, themi po e rekomandojmë, kur themi nuk e rekomandojmë, do të thotë se kjo kërkesë merr përgjigje prej KPF-së, i dërgohet atij që na është drejtuar, edhe arsyetohet baza pse ndalet kjo. Po, urdhëro drejtor?

Binak Syla, drejtor i Administratës: Përshëndetje për kryesuesin dhe për të gjithë ju të pranishmit!

E tha edhe kryesuesi, e tha edhe drejtori pak më parë, lista e dhënieve në shfrytëzim të lokaleve edhe banesave që janë të planifikuara nga ekzekutivi dhe nga Kuvendi, besoj që ka kaluar edhe te Kuvendi, ju e dini mirë se një listë e hartuar që është marr nga ekzekutivi për të gjitha lokalet që është e mundshme m'i dhanë në shfrytëzim, ka kaluar edhe këtu. Kemi kërkesa të ndryshme edhe nga shoqata të dala nga lufta dhe në shoqatën e të pagjeturve dhe kërkesa të tjera, të cilave nuk kemi mundur me ju dhanë ndonjë zgjidhje tjetër përpos kësaj që e thamë. Absolutisht asnjë mjet nuk mund të jepet në shfrytëzim pa procedurë prokurimi, procedura e prokurimit i do disa procedura tjera të ndjekjes dhe të gjithë janë të barabartë, të gjithë mund të konkurrojnë.

Ne e dimë se vlerë më të madhe se shoqatat e dala nga lufta nuk kemi ne si popull këtu, po megjithatë nuk kemi mundur as atyre me ju dal mundësinë dhe me ju dhanë hapësirë tjetër, përpos atyre që e kanë qysh e kanë për momentin. Ato janë në shfrytëzim, siç e ka edhe OJQ "ZANA" edhe në të kaluarën, edhe e ka prej fillimit në shfrytëzim, po ashtu, sikur e kanë të gjitha OJQ-të e tjera, mendoj që kjo është e vetmja mundësi, ashtu siç e tha edhe kryesuesi.

Mendoj që duhet të përfundojë këtu ky epilog edhe m'i dhanë mundësi aplikimit me thirrje publike, ku bëhet me rastin e prokurimit te avokati.

Fadil Gashi, Kryesues: Faleminderit, drejtor! Po, Tunë?

Tunë Deda: Atë që e tha Binaku, e kisha në plan ta them edhe unë dhe pajtohem me mendimin e tij.

Fadil Gashi, Kryesues: Faleminderit, dikush tjetër? Atëherë ne e ndërtojmë përgjigjen edhe i kthejmë përgjigje duke ju nënshtruar procedurave të Ligjit për Dhënie në Shfrytëzim të Hapësirave Publike. Kush është për?

-Komiteti për Politikë dhe Financa, pas shqyrtimit të kërkesës së parashtruar nga OJQ "ZANA" për sigurimin e një hapësire për zhvillimin e aktiviteteve të OJQ-së, me 6 vota PËR, rekomandoi që OJQ "ZANA" të aplikojë me rastin e shpalljes së dhënies në shfrytëzim pronat komunale, procedura të cilat i parasheh Ligji Nr.06./L-092 dhe Rregullorja (QRK) Nr. 09/2020 për përcaktimin e procedurave të dhënies në shfrytëzim dhe këmbim të pronës së paluajtshme të komunës.

Pika 6. Të ndryshme.

Fadil Gashi: Ju e dini se muajin gusht e kemi pushim në kalendar, edhe unë kam biseduar edhe me kryetarin, ne e kemi pasur një vizitë të planifikuar në qershor, e kemi zhvendosur qershorin, por nëse jeni dakord që s'duhet të zhvillohet ajo vizitë në këtë vit, ne jemi në rregull. Ne duhet ta dimë sepse akoma jemi në bartje të mjeteve, se nuk ka mjete, sepse janë harxhuar një pjesë e mjeteve në përfshirje të llaptopëve aty ku i kemi pasur edhe nuk kemi mjete të orientuara, prandaj duhet me i ndihmuar edhe ekzekutivit, kryetarin e drejtorisë, gjithëve, për të ditur me i orientuar mjetet, por nuk kisha dashur me e marr me kaq neglizhencë këtë punë. Deri në seancë është mirë të bisedojë secili prej jush e prej nesh edhe t'i dimë orientimet tona që ndihmojnë ekzekutivin, duke munduar t'i gjejë mjetet e m'i orientuar mjetet që duhen ose që janë të nevojshme për me e realizuar këtë vizitë, nëse jo, e vendosni ju, nuk kemi ndonjë obligim sepse ashtu kështu mjetet nuk janë, s'kemi obligime tjera. Urdhëro, Tunë?

Tunë Dedaj: Po, kryesues, faleminderit! Ne e kemi bërë këtu vendim, se s'kemi sjellë vendim këtu për të shëtitur në Turqi, por kemi thënë se duam të shkojmë për një vizitë pune edhe atë vizitë pune është mirë për ta realizuar. S'ka rëndësi që është shtyrë, ta realizojmë në muajin shtator edhe t'i parashohim mjetet edhe t'i gjejmë mjetet për të shkuar, se ne këtu në Kuvend e kemi sjellë këtë vendim edhe nuk e di pse është neglizhuar kështu. Unë jam për të shkuar edhe po besoj që edhe kolegët e mi më përkrahin, se ajo vizitë nuk është për shëtitje, nuk është ekskursion, është vizitë pune.

Fadil Gashi, Kryesues: Ne e kemi parë edhe në kalendar, është vizitë pune, ne nuk mund të ja ndërrojmë emrin, as nuk është diçka që s'është duke ndodhur për secilin Kuvend Komunal, po e kemi pasur bisedë me kryetarin edhe kanë nevojë për ta ditur dhe për ta sqaruar edhe njëherë. Po, urdhëro, drejtor?

Enver Berisha, drejtor i FEZH: Është mirë, kryesues, brenda këtij afati deri në seancë që edhe ne bashkë me kryetarin, me këqyr ku janë mundësitë, se këto janë në kuadër edhe të Kuvendit, të shikojmë a janë të pajtimit të shkojnë apo jo. Atëherë vendimi i Kuvendit dihet që pavarësisht

kalendarit që është, por nëse duhet edhe një rikonfirmim i anëtarëve të Kuvendit, pse jo në seance me bërë edhe me i obliguar, me i gjetur mjetet edhe me i realizuar, edhe në fund, kryesues, është mirë ju të mendoni për debatin që duhet të mbahet, për Kornizën Afatmesme Buxhetore, në kuadër të Kuvendit.

Fadil Gashi, Kryesues: Po, ne veç e kemi caktuar datën , më 27 qershor e kemi debatin me publik këtu, mirë ka qenë edhe ju anëtarët e KPF-së të merrni pjesë. Nëse nuk keni diçka tjetër, unë po e përfundoj mbledhjen e Komitetit për Politikë dhe Financa. Faleminderit për pjesëmarrje!

Procesmbajtësja,
Monika Palushi



KRYESUESI,
Fadil Gashi

